

Carta nu cuití naçahyí Pablo nuú na cúu cuéntá Jesús ñuu Tesalónica

Pablo xihín da xíca xihín dá chindahá da Ndióxi coo na cúu cuéntá Jesús ñuu Tesalónica

1 Yehe cúu Pablo, da cáhyí carta yóho xihín Silvano xihín Timoteo ta chindahá i ña nuú ndihi ndó, na cúu cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. Ná caja Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

Cándeé cáhnu ini na Tesalónica Jesús

²Já cuití ndíquiahva nde ndixahvi nu Ndióxi sahá ndihi ndó. Ta co ndíndójó nde xíca tahví nde nu mé á saha ndo. ³Ndíquiahva nde ndixahvi nu Ndióxi, tátá yo saha ndo jáchi cándeé cáhnu ini ndó mé á. Ta sahá ña quíhvi ini ndó mé á sahá ña cán queá caja chúun vaha ndó cuéntá mé á. Sahá ña cándeé ini ndó Jesucristo ña quixi tucu a ñuyíví yóho sahá ña cán queá caja ndeé ini ndó tá ndóho ini ndó. ⁴Cuni johó vaha ndó, ñani mí i, na cúu cuéntá Jesús. Sa xíní nde ña quíhvi ini Ndióxi ndohó ta naçaxi a ndohó cacuu ndó cuéntá mé á. ⁵Tá naçaxi tuhun nde tuhun vaha sahá Jesús nu ndo a juú tuhun uun naçahan nde xihín ndo. Naçahan nde mé tuhun xihín ndée ña nasahan ínima yíi Ndióxi nuú nde. Ña cán queá sa xíní ndo ña ndaa cuití va naçahan nde xihín ndo. Ta sa xíní vaha ndó ña naçaja ndaa nde tá nasanduu nde xihín ndo jáchi cúní nde chindeé nde ndohó.

⁶Anda jáví naçasáhá ndó caja ndó ña naçaja mé nde xihín ña naçaja Jesucristo. Jáchi nandiquehe vaha ndó ña najánaha nde nu ndo. Ta vatí nandoho ndivaha ini ndó joo naçavatá ndo naçaja ínima yíi Ndióxi. ⁷Ta tá nandihí nanduu ndó na jánaha nu tóco ndihí na cúu cuéntá Jesús, na ndúu estado Macedonia xihín estado Acaya ña ndítahan caja na. ⁸Ta a juú Macedonia xihín Acaya cuití va vaha jáchi ndijáá ñuu nandicuita nuu tuhun vaha sahá Jesús naçaja ndó. Ña cán queá sa xíní tóco ndihí ñayivi ña cándeé cáhnu ini ndó Ndióxi. Ña cán queá ndá ñuu cása nde cáxi tuhun

na cán nuú nde saha ndo chí co xíní ñúhú ga nde cahan nde saha ndo nu ná. ⁹Ta viti tóco ndihi na cán cáxi tuhun na nuú nde ndaja nandiquehe vaha ndó tuhun nacahan nde xihin ndo tá nasanduu nde xihin ndó ñuu Tesalónica cán. Ta cáxi tuhun na ndaja nandijama ndó tá nandicoo ndó ña cája cáhnu ndó yoco jáchi viti cája cáhnu ndó Ndióxi cuití va. Ta cáxi tuhun na ndaja nandico coo ini ndó ta nacasáhá ndo cája chúun ndó cuénta Ndióxi, mé a cája ña ndaa cuití va, ña tácu a íin a indiví viti. ¹⁰Ta cáxi tuhun na nuú nde ndá quiahva ndáti ndó ndico coo Jesucristo quixi a indiví, mé a cúu jahyi Ndióxi. Ta Ndióxi najánditacu a Jesús, mé á jácacu mí ná a ndóho iní tá ná xinu quiví caja vií Ndióxi sahá cuachi ñayivi.

Chuun nacaja Pablo tá nasahjin da ñuu Tesalónica

2 Ta sa xíní ndihi ndó, ñani mí i, na cúu cuénta Jesús ña coo nacasaa uun va nde ñuu Tesalónica jan jáchi nandiquehe vaha ndó tuhun Ndióxi. ²Joo tá cámani saa nde ñuu ndó jan sa xíní ndo ndaja nacaja xíxi na ñuu Filipos xihin nde ta nacanahá na xihin nde. Joo tá nacasaa nde ñuu ndó nasahan ndée ini nde nacaja Ndióxi já nacaxi tuhun nde tuhun vaha saha Jesús nu ndo vatí ndúu cuahá na co cúní ndehe. ³Ta coo nacahan nde ña tuhún xihin ndo jáchi tuhun ndaa cuití va cúu ña najánaha nde nu ndo. Ta coo nacahvi núu ini nde ta coo najándahvi nde ndohó. ⁴Joo nacaxi Ndióxi ndehe ta nasahnda mé á chuun nuú nde ña ná caxi tuhun nde tuhun vaha saha Jesús nuú ñayivi. Ta vatí co táhán ini ñayivi xihin ña cahan nde joo coo nandijama toho nde ña. Jáchi Ndióxi quea sándehe ínima yo ta táhán ini a xihin ña cahan nde. ⁵Sa xíní vaha ndó nacahan ndaa nde xihin ndo ta coo nacahan chíjin nde xihin ndo. Ta coo najándahvi nde ndohó sahá jiuhún. Joo xíní ndaa táhyí Ndióxi ña ndaa cuití va nacahan nde xihin ndo. ⁶Ta sa xíní vaha ndó ña ni tañu mé ndó ta ni tañu java ga ñayivi coo nandinducú nde ña ná caja cáhnu ñayivi ndehe vatí íin saha nde cahnda nde chuun nu ndo jáchi cúu nde na apóstol nachindahá Ndióxi nu ndo. ⁷Joo nacaja vií nde xihin ndo tá quiahva ndaa vaha in ñáñaha jahyi ña. ⁸Ta cúní ndivaha nde ndohó ña cán quea nacaxi tuhun nde tuhun vaha sahá Jesús nu ndo. Ta íin tiahva nde quivi nde saha ndo jáchi quíhvi ini nde ndohó. ⁹Ñani nde, na cúu cuénta Jesús, á co ndícuhun ini ndó ndá quiahva nacaja nde tá nasanduu nde xihin ndo cán. Nuú tá ndiví nacaja chúun nde já ná cuu chahvi nde sahá ña xíxi nde. Jáchi co cúní nde jáquihvi nde ndohó nani cáxi tuhun nde tuhun vaha sahá Jesús nu ndo.

¹⁰Ta sa xíní ndaa táhyí ndihi ndó, na cúu cuénta Jesús ña nacaja vaha nde xihin ndo ta cuu cahan ndó saha nde. Ta xíní táhyí Ndióxi ña nacaja ndaa nde xihin ndo ta nacaja vií nde xihin ndo ña cán quea a cuú chicaan

ñayivi cuachi jatá nde. ¹¹Sa xini vaha ndó ndaja najácahan nde in in ndó ta ndaja nasahan nde tuhun ndeé ini ndó ña ná candico cáhnu ndó íchi cuéntá Jesús. Tátuhun cája in dataa xihín jahyi da já nacaja nde xihin ndo. ¹²Ta nasahnda nde chuun nu ndo caja ndó ña cuni Ndióxi jáchi cúu ndó cuéntá mé á. Mé Ndióxi, mé a sáhdá chuun indiví, mé a cán quea nacaxi a ndohó cahnda ndó chuun xihin á. Mé á cúu á in Ndióxi cáhnu ndivaha ta ndaja cáhnu mé á ndohó xihin á.

¹³Ña cán quea ní tiempo ndíquiahva nde ndixahvi nu Ndióxi jáchi nandiquehe vaha ndó tuhun Ndióxi ña nacaxi tuhun nde nu ndo. Tá naxini johó ndó ña já nacandaa ini ndó ña cúu á tuhun Ndióxi ta co cúu á tuhun ñayivi ñuyívi. Ta mé a ndaa cúu á tuhun Ndióxi jáchi tá naxini johó ndó ña já quea najándicoo ndó cuachi cája ndó sahá ña cándeé ini ndó Jesús.

¹⁴Anda jávi mé ñayivi ñuu ndó nacasáhá na jándoho na ini ndóhó, ñani mí i ta nacaja xixi na xihin ndó. Ta quiahva já nandoho na cúu cuéntá Jesús estado Judea. Jáchi na Israel, na ndúu estado Judea nacaja xixi na xihin ná. ¹⁵Jihna nasahní java na Israel na profeta cuéntá Ndióxi. Ta quiahva já nasahní java ri na Israel Jesucristo, xitoho í. Ta viti java na Israel cája xixi na xihín nde ta nataxí na ndehe veñuhu. Co cájii ini Ndióxi xihin ná jáchi cándají na tóco ndihi ñayivi. ¹⁶Ta coó nasahan na ñamaní nuú nde caxi tuhun nde tuhun vaha sahá Jesús nuú ñayivi, na coó naquixi chichi Israel ña ná jácacu Ndióxi na. Ta sahá ña yóho nandicuahá cuachi na nu Ndióxi ta sahá ña cán quea xójo ini a xihin ná ta viti naxinu coo hora jándoho a ini na.

Cúni Pablo coto nihni tucu da ñayivi ñuu Tesalónica

¹⁷Ñani mí i, na cúu cuéntá Jesús, tá nandihí naquee nde ñuu ndó jan já nandicuhun ini nde saha ndo. Núhu ini nde saha ndo vatí co xíní nde ndohó xihin nuú nde. Ta ndiáva ini nde ndicó coo nde ñuu ndó coto nihni nde ndohó. ¹⁸Nasacu ini nde saa nde nu ndo. Ta yehe, da cúu Pablo cuahá tañu nacacúni saa i ñuu ndó joo tiñáhá sacuahá nasaji nuu rí nuú i sahá ña cán quea coo nacuu saa i jan. ¹⁹Ndá saha quea cándeé ini nde ndohó ta ndá saha quea cájii ini nde ta ndá saha quea coo vaha ini nde tá tandaa quivi quixi tucu Jesucristo ñuyívi yóho. Sahá ña ndíco ndo íchi cuéntá Jesucristo, xitoho í sahá ña cán quea cájii ini nde. ²⁰Mé a ndaa ín vaha ini nde ta cájii ini nde cája ndó.

3 Ta sahá ña cuni ndivaha i candaa ini i ndaja ndúu ndó cán sahá ña cán quea nasacu ini i candoo in tálaá mí i ñuu Atenas. ²Ta nachindahá i ñani Timoteo, mé da cája chúun xihin nde cuéntá Ndióxi cáxi tuhun da tuhun vaha sahá Jesucristo nuú ñayivi. Nachindahá i da saa da coto nihni da ndohó já quea jácahan da ndohó ña ná coo ndacú chága ínima ndó nu

Ndióxi ta ná chindeé da ndohó candeé cáhnu chága ini ndó Ndióxi. ³Jáchí cúní nde ña ná coo ndacú ini ndó ná a jándicoo ndó íchí cuéntá Jesús vatí cája xíxi ñayivi xihín ndo. Jáchí sa xíní vaha ndó ña ndítahan nu yó ndóho tá ndóho iní sahá Jesucristo. ⁴Á cō ndícuhun ini ndó tá nasanduu nde xihín ndo nacaxi tuhun nde nu ndo ña vaxi quiví ndoho iní saha mé á. Ta viti sa xíní ndó ña nayaha ña nacahan nde xihín ndo. ⁵Sahá ña coó nañehé e tuhun saha ndo sahá ña cán quéa nachindahá i Timoteo nu ndo ná cañehe da tuhun saha ndó quixi a nuú i já ná candaá ini i á mé a ndaa táhyí ndíco cáhnu ndó íchí cuéntá Jesús. Jáchí nayihví i ña jándahvi tiñáhá sacuahá ndohó. Ta tá ná quee vaha tiñáhá sacuahá xihín ndo, nduu já quéa mé a uun quéa nacahan nde tuhun Ndióxi xihín ndo.

⁶Joo viti chá va naquixi Timoteo yóho tá nandihi naxito nihni da ndohó jan. Ta nañehe dá tuhun vaha saha ndo ña candeé ini ndó Jesucristo ta quíhvi ini táhan ndó. Ta cáchí da ña ñúhu ndivaha ini ndó sahá nde. Ta xíca ndivaha ini ndó cuni ndó ndehe tá quiahva xíca ndivaha ini nde cuni nde ndohó. ⁷Cándehe ndó, ñani i. Vatí ndóho ndivaha ini nde yóho joo nasahan ndeé ini nde jáchí nañehé nde tuhun ña candeé cáhnu ini ndó Jesús ta ndíco cáhnu ndó íchí cuéntá mé á. ⁸Ta nandivaha ini nde jáchí candaá ini nde ña ndacú ín ini ndó xihín Jesucristo, xitoho í. ⁹Ta cō ñehe ga nde ndá quiahva ndiquiahva nde ndixahvi nu Ndióxi saha mé ndó jáchí cájii ndivaha ini nde nacaja ndó. ¹⁰Chí ñuú ta ndiví xíca tahví nde nu Ndióxi ña ná quiahva ñamaní nuú nde saa nde coto nihni nde ndohó jáchí cúní nde xinu coo nde jánahá chága nde tuhun Ndióxi nu ndo já ná candeé cáhnu chága ini ndó mé á.

¹¹Ña cán quéa xíca tahví nde nu Ndióxi, tátá yó xihín Jesucristo, xitoho í ña ná chindeé a ndehe saa nde nu ndo coto nihni nde ndohó. ¹²Ta ná caja Ndióxi ña ná quíhvi chága ini táhan ndó. Ta ná chutú ndaa ini ndó xihín ña quíhvi ini ndó tóco ndihi ñayivi tá quiahva quíhvi ini nde ndohó. ¹³Ta ná caja Ndióxi ña ná coo ndacú ínima ndo nu mé á. Ta ná jándoo a ínima ndo já ná coo víi a nu mé á tá ná quixi tucu Jesucristo ñuyíví xihín ndihi na cúu cuéntá mé á.

Ña ndítahan nu yó caja í já ná tahan ini Ndióxi xihín yó

4 Cuni johó vaha ndó ñani mí i, na cúu cuéntá Jesús. Jihna najánaha nde ndohó ndaja ndítahan caja ndó já ná tahan ini Ndióxi xihín ndo. Ta xíní nde já cája ndó anda viti. Xihín ndée sáhan Jesucristo nuú nde xíca tahví nde nu ndo ta sáhndá nde chuun nu ndo ña ná a jándicoo ndó caja ndó ña najánaha nde nu ndo.

²Sa xíní vaha ndó ña sáhndá nde chuun nu ndó jáchí nasahnda Jesucristo, xitoho í chuun nuú nde cahan nde ña yóho xihín ndo. ³Ña cúní

Ndióxi quéa ná coo vií ínima ndó nū mé á ta ná a cája ndó cuachi ña coo ndó xihín najihí á taa, na co cúu ñájihí ndo á yíi ndo. ⁴Ña cúní Ndióxi quéa ná tandaha ndó xihín in tálaá ñañaaha. Ta ná coo vií ndó xihín ña ta ná caja cáhnu ndó ña. ⁵Ta ná a ndiáva ini ndó caja núu ndó xihín ña tá quiahva cája ñayivi, na co xíní Ndióxi. ⁶Co ndítahan caja ndó cuachi xihín ñájihí ñani táhan ndó jáchi xihín ña yóho jándahvi ndó yíi ña. Ta jándoho ndivaha Ndióxi ini tóco ndihi na cája já. Ta sa xíní vaha ndó ña yóho jáchi naçaxi tuhun nde ña nū ndó jihna. ⁷Jáchi coo naçana Ndióxi mí ña ná caja í cuachi. Naçana mé á mí jáchi cúní a ña ná cacuu ñayivi yíi, na íin vií ínima. ⁸Ta ndá na co cúní cuni johó ña jánaaha nde já quéa cándaá ini ndó ña a juú ndehe cuití va cándají na. Jáchi quéhe núu na Ndióxi sahá ña co cája na ña cúní mé á. Ta Ndióxi quéa nasahan ínima yíi mé á nū yo cañuhu a iní.

⁹Sa najánaaha va Ndióxi ndohó ndá quiahva ndítahan quihvi ini táhan ndó, na cúu cuéntá Jesús. Sahá ña cán quéa nū carta yóho co ndítahan cahyí tucu u ña nū ndo. ¹⁰Ta sa xíní vi ña mé a ndaa quihvi ini ndó tóco ndihi na cúu cuéntá Jesús ndúu estado Macedonia. Joo xíca tahví i nū ndó, ñani mí i ña ná quihvi chága ini ndó na. ¹¹Xíní ñúhú nducú ndo coo vaha ini ndó xihín ndihi ñayivi. Ta nducú ndo coo ndisáhnu ini ndó. Ta ndítahan nū in in ndó caja ndó chuun mé ndó jáchi já najánaaha nde nū ndó jihna. ¹²Ta tá ná caja chúun vaha ndó já quéa cahan vaha ñayivi, na co cúu cuéntá Jesús sahá ndo. Ta tá ná caja chúun vaha ndó já quéa a ndímaní ni in ñaha nū ndo catacu ndó.

Vaxi quiví quixi tucu Jesucristo ñuyíví yóho

¹³Ta viti cúní nde ndicani nde nū ndó, ñani i, na cúu cuéntá Jesús ña ná cándaá vaha ini ndó ña ndaa sahá ñayivi, na sa naxihí. A cácuéha ini ndó sahá ná tá quiahva cája ñayivi, na co cándeé ini Ndióxi. ¹⁴Tá quiahva cándúsa nde ña naxihí Jesucristo ta nanditacu tucu a quiahva já cándúsa nde ña jánditacu tucu Ndióxi na sa naxihí, na nasandee ini mé á tá nasatacu na. Caja Ndióxi ña ná quixi na cán xihín Jesús tá ná quixi tucu a ñuyíví yóho.

¹⁵Ña cán quéa cahan nde ña yóho xihín ndo ta cúu á ña najánaaha Jesucristo, xitoho í nūú nde. Tá ná quixi tucu mé á ñuyíví yóho ndiquehe a mí já quéa a cūhun toho jihna ñúhú na tácu ñuyíví yóho jáchi jihna ñúhú ndindita na sa naxihí. ¹⁶Jihna ñúhú nuu Jesucristo quixi tucu a ñuyíví yóho. Ta mé já cayuhú a cahnda a chuun nūú ndihi ñayivi. Já cayuhú táto sacuaaha Ndióxi ta ndahyi trompeta Ndióxi. Já nditacu nū cuítí na sa naxihí, na cándúsa Jesucristo. ¹⁷Anda jáví tóco ndihi mí, na tácu ndique táhan í xihín na nanditacu nū cuítí ta cañehe Ndióxi mí tañu vico. Já

ndique táhan í xihín Jesucristo, xitoho í nū táchi ta já coo í xihín mé á anda ama cáa quivi. ¹⁸Sahá ña cán quea ndítahan nū ndó quiahva tuhun ndeé ini táhan ndó xihín tuhun yóho.

5 Candehé ndo, ñani i, na cúu cuéntá Jesús. Co xíní ñúhú cahyí i nū ndo saha ndá ama quixi tucu Jesucristo ñuyíví yóho. ²Jáchí cándaā vaha ini ndó ña mé quivi co cáhán yo quixi Jesucristo ñuyíví yóho já quixi mé á. Tá quiahva jonáá cuití va xínu in da cuihná tá ñuú quiahva já jonáá xínu Jesucristo ñuyíví yóho. ³Tá ná cahán ñayivi sa ndúu vaha ndivaha na ta ni in ñaha a cúu yihví na anda jáví jonáá xínu ña ndoho ndivaha ini na. Tá quiahva jonáá xínu ña sáhná a tixi in ñáñáha tá cúní cacu jahyi ña quiahva já xínu quivi ndihi saha ná. Ta ni in na a cuú cacu toho. ⁴Joo mé ndó, ñani mí i, na cúu cuéntá Jesús co ndúu ga ndó nuú naá saha ña cándaā ini ndó ña quixi tucu Jesucristo ñuyíví yóho. Ta vatí catóntó ndo tá ná xínu in da cuihná nū ndo joo co ndítahan catóntó ndo tá ná quixi tucu Jesucristo. ⁵Jáchí tóco ndihi ndó, na cándeé ini Jesucristo ndúu ndó nū yéhe saha ña xíca ndó íchi cuéntá Jesús. Co xíca toho ndó íchi nuú naá nū xíca ñayivi ñuyíví, na co cándeé ini Jesucristo. ⁶Sahá ña cán quea ndítahan coo tiahva í candatí quixi Jesucristo ta a cúu yo tá quiahva cája java ga ñayivi. Ña ndítahan caja í quea cañuhu táhyí iní xihín tóco ndihi xíní túní yo candatí xínu Jesucristo. ⁷Jáchí na quíji, quíji na tá ñuú ta na xíhi, xíhi na tá ñuú. ⁸Joo mí sa xíca í nū yéhe ta ndítahan cañuhu táhyí iní. Ndítahan nū yó chindeé yo mí. Tá cándeé iní Jesucristo ta tá quíhvi ini táhan í já cúu á tátuhun ndíxi yó cotó caa. Tá ndatí quixi tucu Jesucristo jácacu a mí já cúu á tátuhun ñúhu ndó yíjini caa. ⁹Jáchí coo nacaxi Ndióxi mí ndicuehe a xihín yo jáchi naxihi Jesucristo, xitoho í saha cuachí saha ña cúní a jácacu a mí ná a cúhun yó indayá. ¹⁰Naxihi Jesucristo saha yo ta tá tácu yo á sa naxihi yo mé quivi quixi tucu a ñuyíví yóho já quea cañehe a mí cohó coo í xihín mé á anda ama cáa quivi. ¹¹Ña cán quea quiahva tuhun ndeé ini táhan ndó ta chindeé táhan ndó tá quiahva sa cája ndó.

Ndícani Pablo nuú na cúu cuéntá Jesús ña ndítahan caja na

¹²Ta viti xíca tahví nde nū mé ndó, na cúu cuéntá Jesús ña ná caja cáhnu ndó ñayivi, na cája chúun tañu ndó jáchi ndáca na ndohó íchi cuéntá Jesucristo, xitoho í ta jánaha na tuhun Ndióxi nū ndo. ¹³Ndítahan coo toní ñúhú ndo xihín ná ta quíhvi ini ndó na xihín ndinuhu ini ndó jáchi cája chúun na cuéntá Ndióxi tañu ndó. Coo vaha ini ndó xihín ñani táhan ndó.

¹⁴Xíca tahví nde nū ndó ña ná jánani ndó ndá na co cúní caja chúun. Quiahva ndó tuhun ndeé ini ndá na cácuéha ini. Chindeé ndó ñayivi, na vitá ini xihín tuhun Ndióxi. Ta coo cáhnu ini ndó xihín ndihi ñayivi.

¹⁵Candehé ndo. A ndúcú ñehe ndó ña núu cája inga na xihín ndo. Ta ndinducú ndo caja vaha xihín táhan ndó níí tiempo ta quiahva já caja ndó ña vaha xihín tóco ndihi ñayivi.

¹⁶Ná coo vatá ini ndó níí tiempo. ¹⁷Ta caca tahví ndó nu Ndióxi níí tiempo. ¹⁸Ndá nacuu ña ndóho ndó ndítahan nu ndo ndiquiahva ndó ndixahvi nu Ndióxi sahá jáchi ña yóho cúni Ndióxi caja mé ndó, na cúu cuéntá Jesús.

¹⁹A cáji nuu ndó nuú ña cúni ínima yíi Ndióxi caja xihín ndo. ²⁰A quéhe núu ndó ñayivi, na jáyaha tuhun, ña nasahan Ndióxi nu ná cahan na xihín ndo. ²¹Coto ndojó ndo tóco ndihi ña cahan na xihín ndo. Caxi ndó ña vaha ²²ta caxoo ndó nu tóco ndihi ña núu.

²³Ta Ndióxi, mé a cája ña coo vaha ini ndó, ná caja yíi ndihi a ndohó. Ná caja yíi á ínima ndo xihín yiquí cuñu ndó já ná coo vií ndo tá ná xinu quiví quixi tucu Jesucristo, xitoho í. ²⁴Jáchi sa nacaxi Ndióxi mí ta a jándicoo a mí anda quiahva jáxinu coo a tóco ndihi ña nacachi a.

Jáxinu coo Pablo ña cahan da ta ndíndayí da na

²⁵Ñani mí i, na cúu cuéntá Jesús, caca tahví ndo nu Ndióxi sahá nde.

²⁶Cahan Ndióxi ndó xihín ndihi na cúu cuéntá Jesús ta tatí yúhu táhan ndó ta yíi caja ndó ña.

²⁷Candehé ndo, ñani i, na cúu cuéntá Jesús. Sáhndá i chuun nu ndó cuéntá Jesucristo, xitoho í ña ná cahvi ndó carta yóho nuú ndihi na cúu cuéntá Jesús ndúu xihín ndó jan.

²⁸Ná caja Jesucristo, xitoho í cuahá ñamaní xihín ndo. Já ná coo.